



MØTEINNKALLING

Utval: Naturutvalet
Møtedato 25.05.2021
Møtetid: Kl. 15:00
Møtestad: Fjernmøte på Teams

Varamedlem skal ikkje møta utan nærare innkalling

Forfall til møtet må meldast snarast råd til servicesenteret (tlf. 56 58 74 00 eller e-post postmottak@samnanger.kommune.no), som vil kalla inn varamedlem.

Me ber om at alle som kan vera ugilde i ei eller fleire saker på sakslista melder frå om dette til servicesenteret.

Karl Bård Kollbotn
leiar i utvalet

SAKLISTE

Saker til handsaming på møtet

Sak nr.	Arkivsak	Sakstittel	Merknad
012/2021	21/351	Faste saker	
013/2021	19/13	Uttale til Regional plan for vassforvaltning for Vestland vassregion	
014/2021	18/554	Søknad om dispensasjon frå delar av bandleggingssone i kommunedelplan for Fv 49 Tunnel bak Tokagjelet	
015/2021	21/78	Vilt- og fiskefondet 2021	

Oversikt faste saker
• Godkjenning av innkalling og sakliste • Eventuelle merknader til protokoll frå førre møte • Orienterings-/referatsaker • Utvalet sitt kvarter



SAKSFRAMLEGG

Sakshandsamar: Marianne Soleng	Arkivkode: FE-033
Arkivsaksnr: 21/351	Løpenr: 21/4161
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Naturutvalet	25.05.2021	012/2021

Faste saker

Rådmannen sitt framlegg til vedtak:

- Møteinnkallinga og saklista vert godkjent.
- Orienteringssaker/referatsaker vert tekne til orientering.

Oversikt over faste saker:

Godkjenning av innkalling og sakliste.
Eventuelle merknader til protokoll frå førre møte.
Orienteringssaker/referatsaker.
Utvalet sitt kvarter.

Informasjonssaker:

Årsrapport frå Bergen og Omegn Friluftsråd (BOF)

**SAKSFRAMLEGG**

Sakshandsamar: Ragnhild Lønningdal	Arkivkode: FA-K54
Arkivsaksnr: 19/13	Løpenr: 21/3765
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Naturutvalet	25.05.2021	013/2021
Kommunestyret		

Uttale til Regional plan for vassforvaltning for Vestland vassregion 2022-2027**Rådmannen sitt framlegg til vedtak:**

Vestland fylkeskommune, vassområdekoordinatorane og alle kommunane har gjort eit stort og grundig arbeid med å utarbeida ein heilskapleg plan for alt vatn i fylket/vassregionen. Dette er eit svært omfattande arbeid om eit viktig tema, og planen inneheld ei rekkje tiltak for å betra vasskvaliteten i fylket. Plandokumenta er oversiktlege og gjev eit godt grunnlag for å arbeida vidare med forvaltning av vatnet.

Samnanger kommune har ein del konkrete tilbakemeldingar på kunnskapsgrunnlaget og tilhøyrande tiltaksforslag i Vann-nett, og rådmannen vil i tide til kommunestyremøtet laga ein detaljert tabell med tilbakemeldingar om kva som er feil eller ikkje komplett informasjon om den enkelte vassførekomst/påverknad/tiltak. Desse tilbakemeldingane kan då leggjast ved og bli ein del av kommunestyret sitt vedtak om uttale.

Det finst per i dag ingen tilskotsordningar for gjennomføring av opprydding i avløpsproblematikk. Plandokumenta skisserer at det skal arbeidast for å innføra ei slik ordning. Me vil på det sterkaste oppmoda om at ei slik tilskotsordning vert innført, slik at det vert realisme i planane om alle avløpstiltaka som kviler på kommunane. Likeeins er det behov for fleire tilskotsordningar/meir tilskotsmidlar innanfor landbruket.

Dokument som er vedlagt:

Rettleiing til høyringsinnspel (1)

Regional plan for vassforvaltning for Vestland vassregion 2022-2027 - Høyringsutgåve (1)

Komprimert

Tiltaksprogram for Vestland vassregion 2022-2027 - Høyringutgåve (1)

Handlingsprogram for Vestland vassregion 2022-2027 - Høyringsutgåve (1)

Sentrale omgrep i vassforvaltninga

Tabell over føreslåtte tiltak i vassdrag i Samnanger

Dokument som ikkje er vedlagt:

Data om kvar enkelt vassførekomst er tilgjengeleg i www.vann-nett.no.

Kva saka gjeld:

Dei regionale vassforvaltingsplanane med tilhøyrande tiltaksprogram for 2016-2021 i heile Noreg skal no oppdaterast og revurderast. Vi er inne i andre planrunde av dei regionale vassforvaltingsplanane. Vassregionane Hordaland og Sogn og Fjordane har vore eigne vassregionar i perioden 2010-2019, men vart slegne saman frå 1.1.2020 til Vestland vassregion. Planen for Vestland vassregion 2022 - 2027 bygger på gjeldande vassforvaltningsplanar for 2016 -2021, ein plan for Hordaland vassregion og ein for Sogn og Fjordane vassregion.

Til vassforvaltningsplanen for 2022 - 2027 er det utarbeidd eit tiltaksprogram og eit handlingsprogram. **Alle tre dokumenta er på høyring med høyringsfrist 30.06.21.**

Plandokumentet har også ein kortversjon/samandrag av planen, som gjev eit godt overblikk. Dette finn ein på side 5 til 9 i «Regional plan for vassforvaltning».

Vassforvaltningsplanen er ein regional plan etter plan – og bygningslova § 8-3. Planen og tiltaksprogrammet vert oppdatert kvart 6. år i samsvar med vassforskrifta §§ 25 og 26. Det vert vurdert årleg om det er trong for å oppdatere Handlingsprogrammet jf. plan- og bygningslova § 8-1.

Forskrift om rammer for vassforvaltninga (vassforskrifta) trådde i kraft 1. januar 2007 og innførte vassrammedirektiv til EU i norsk forvaltning. Vassforskrifta stiller krav til innhald i vassforvaltningsplanen og tiltaksprogrammet. Ho stiller og tydelege krav til vassforvaltning:


- all vassforvaltning skal samordnast på tvers av alle sektorar som forvaltar vatn
- økosystemtankegang
- alt vatn skal forvaltast innan sitt nedslagsfelt.
- alt vatn skal minst ha god økologisk tilstand.
- alt vatn skal minst ha god kjemisk tilstand.
- samfunnsnytte skal vurderast kontinuerleg

Vassforvaltninga etter vassforskrifta skal vere heilskapleg og samordna på tvers av alle sektorar som brukar og påverkar vatn. Statlege etatar, fylkeskommunar og kommunar har bidratt med kunnskap, vurdert påverknadar, skissert tiltak innanfor sine ansvarsområde og tidspunkt for når tiltaka kan verte gjennomført. Vassområdekoordinatorane har vore i dialog med kommunane i sitt/sine vassområde og hjelpt dei med oppgåvene som følgjer av vassforskrifta. Kunnskapsgrunnlaget, miljømål og tiltak til planen er samla i databasen vann-nett.no. Planen og tiltaksprogrammet summerer opp innhaldet i Vann-nett. Vassområda har utarbeidd underlagsdokument som grunnlag til planen og tiltaksprogrammet. Vassområdeutvala er leia av kommunane. På nettsida www.vannportalen.no kan ein finna svært mykje informasjon om vassforskrifta og arbeidet med vassforvaltningsplanane.


Figuren nedanfor illustrerer korleis miljømål, tilstand og tiltak heng saman i ein vassførekomst. Ein vassførekomst kan t.d. vera ein innsjø, ei elv med sidebekkar (vassdrag), ei gruppe av mindre elvar, ein grunnvassførekomst eller ein fjord. Alle vassførekomstar er å finna i www.vann-nett.no. Sjå vedlegget «Sentrale omgrep i vassforvaltninga» for definisjonar av alle dei ulike omgrepa som vert brukt i vassforvaltningsplanen.

Miljømål i ein vassforekomst

Miljømål er oppnådd når vi har SVÆRT GOD/GOD økologisk tilstand
Miljømål er oppnådd når vi har GOD kjemisk tilstand



Figur 1: Her er dei fem klassane for miljøtilstand som følger av vassforskrifta vist. For dei fleste vassførekomstane er miljømålet «God tilstand» og dette er miljømålet som skal nåast. Dersom miljøtilstanden for den enkelte vassførekomst er moderat eller lågare, er det behov for tiltak for å nå miljømålet om god tilstand. Samtidig er det viktig å unngå aktivitet som gjer miljøtilstanden dårlegare der miljømålet «God tilstand» alt er nådd.



Figur 2: Alle vassførekomstane i Samnanger med fargekoding som syner økologisk tilstand (og økologisk potensial for «sterkt modifiserte vassførekomstar», desse er markerte med striper i staden for heildekkande farge).

Vurderingar og konsekvensar:

Kvaliteten på plandokumenta er vesentleg forbetra i frå førre versjon av vassforvaltingsplanen for Hordaland vassområde (2016-2021). Dette er eit svært omfattande arbeid med eit viktig tema, og planen inneheld ei rekkje tiltak for å betra vasskvaliteten i fylket. Me har ikkje mykje å utsetja på sjølve plandokumenta. Uttalen vil i hovudsak heller basera seg på kunnskapsgrunnlaget om kvar enkelt vassførekomst, slik den går fram av Vann-nett, samt tiltaka som er føreslått for å forbetra vasskvaliteten eller kunnskapsgrunnlaget.

Innanfor tidsramma frå planen vart sendt på høyring til sakspapiret til naturutvalet måtte ferdigstillast har det ikkje vore tid til å ta ein detaljert gjennomgang av tilstand, påverknad, og tiltak for kvar enkelt vassførekomst. Ein slik gjennomgang vil bli gjort i tida fram mot kommunestyremøtet i juni, og lagt ved som supplerande informasjon til sakspapiret som vert sendt ut då.

Situasjonen for vassførekomstane i Samnanger:

Lenkje til faktaark med statistikk for vassførekomstane i Samnanger: <https://vann-nett.no/portal/#/area/4623/MunicipalityID>

Det er totalt 108 definerte vassførekomstar innanfor arealet til Samnanger kommune. Nokre av vassførekomstane deler me med nabokommunane. Vassførekomstane er klassifiserte med ein økologisk tilstand som er God, Moderat eller Dårleg (me har ingen som er klassifisert som Svært dårleg eller Svært god). Figuren under syner talet på vassførekomstar i kvar kategori. Vassførekomstar definerte som «sterkt modifiserte/SMVF» (t.d. regulerte vassdrag) er ikkje med i denne figuren, fordi dei er klassifiserte med økologisk potensial i staden for økologisk tilstand. Me rår til at ein tek ein kikk på www.vann-nett.no og klikkar seg inn på ulike vassførekomstar i kartet. På den måten er det lettare å forstå kva slags informasjon som ligg inne om kvar vassførekomst, og korleis vassførekomstane er inndelte.


Økologisk tilstand, Alle overflatevann

TILSTAND	ANTALL	%
God	34	51.5
Moderat	31	47.0
Dårlig	1	1.5
Alle	66	100.0




Økologisk tilstand, Alle overflatevann

TILSTAND	ANTALL	%
God	34	51.5
Moderat	31	47.0
Dårlig	1	1.5
Alle	66	100.0



Figur 3: Økologisk tilstand i vassdraga i Samnanger, med unntak av dei vassdraga som er påverka av t.d. vasskraftutbygging (SMVF). SMVF er i staden klassifiserte med eit «økologisk potensial».


Påverknadane på vassførekomstane våre er fordelte slik figuren under syner.



Figur 4: Oversyn over alle typer menneskeleg aktivitet som påverkar vasskavliteten i vassførekomstane våre. Det innringa talet er talet på vassførekomstar med den aktuelle påverknaden.

I Samnanger er det påverknad frå sur nedbør som er den faktoren som gjer at flest vassførekomstar er i risiko for ikkje å nå miljømåla. Vidare kjem vasskraft, jordbruk og avløpsvatn. Andre viktige påverknadsfaktorar er fiskeoppdrett, avrenning frå veg, m.m.

Figuren nedanfor syner kva tiltak som er føreslått for vassførekomstane for å nå miljømåla innanfor planperioden. Det er dei ulike sektorstyresmaktene som har føreslått tiltaka.



Figur 5: Prosentfordeling av talet på tiltak som er føreslått for å nå miljømåla for vassførekomstane i Samnanger.

Vedlegget «Tabell over føreslåtte tiltak i vassdrag i Samnanger» har eit tabelloppsett med meir detaljerte opplysningar om føreslåtte tiltak. Tabellen er eit uttrekk frå Vann-nett, og me finn at den inneheld ein god del feil eller manglande oppdatering av status på tiltaka. Endringar me har meldt inn i 2020 er ikkje lagt inn. Fram mot kommunestyremøtet i juni vil rådmannen arbeida vidare med å gå igjennom detaljane og laga ei tilbakemelding på kva endringar me meiner må gjerast.

Kommunen står andsynes ei stor oppgåve med å supplera kunnskapsgrunnlaget og utføra konkrete

tiltak, særleg på avløp. Her er det snakk om problemkartlegging av spreidde avløp rundt i kommunen, og eventuelle pålegg om utbetring av anlegg, betre reinseløysing eller påkopling til offentleg avløp. Kommunestyret bør setja av midlar i budsjettet kvart år i planperioden til å gjennomføra desse tiltaka. Det finst per i dag ingen tilskotsordningar for gjennomføring av opprydding i avløpsproblematikk. Plandokumenta skisserer at det skal arbeidast for å innføra ei slik ordning. Me vil på det sterkaste oppmoda om at ei slik tilskotsordning vert innført, slik at det vert realisme i planen om alle avløpstiltaka som kviler på kommunane.

Hovudplan for vatn og avløp er nemnt fleire stader i plandokumenta som eit viktig verkemiddel for å prioritera tiltak og nå miljømåla. Dette manglar Samnanger, og det ligg ikkje føre planar om å laga ein slik.

Samnanger kommune skal gjennomføra undersøkingar i Samnangerfjorden sommaren 2021, og dette vil føra til eit oppdatert kunnskapsgrunnlag om miljøtilstanden. Betre tiltak kan deretter definerast ut i frå kva som eventuelt er problemet.

Landbruk

Det er Bjørnafjorden landbrukskontor som har hand om tiltaka innanfor landbruket, der det også finst enkelte tilskotsordningar. Til liks med avløpsområdet er det behov for fleire tilskotsordningar/meir tilskotsmidlar innanfor landbruket.



SAKSFRAMLEGG

Sakshandsamar: Ragnhild Lønningdal	Arkivkode: FA-Q10
Arkivsaksnr: 18/554	Løpenr: 21/3995
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Naturutvalet	25.05.2021	014/2021

Søknad om dispensasjon frå delar av bandleggingssone i kommunedelplan for Fv 49 Tunnel bak Tokagjelet

Rådmannen sitt framlegg til vedtak:

Med heimel i plan- og bygningslova § 19-2 vert det gjeve dispensasjon frå delar av bandleggingssona H710 i kommunedelplan for Fv 49 Tunnel bak Tokagjelet, for gjennomføring av delar av reguleringsplan for Eikedalen hyttegrennd. Bandleggingssona H710 gjeld krav om framtidig regulering av ny trasé for fv 49 for heile planområdet innanfor kommunedelplanen.

Dispensasjon vert gjeve til følgjande område i reguleringsplan for Eikedalen hyttegrennd, som har overlapp med kommunedelplan for Fv 49:

- Felles køyreveg f_SKV2, inkludert sideareal annan veggrunn
- Felles parkeringsplass f_SPA1
- Felles renovasjonsareal f_BKT1

Ein slik dispensasjon set ikkje vesentleg til sides nokon av dei omsyna som bandleggingssona eller plan- og bygningslova skal ta i vare. Etter ei samla vurdering meiner me at fordelane er klårt større enn ulempene, og det kan gjevast dispensasjon på vilkår.

Det vert stilt følgjande vilkår for dispensasjonen:

- Vil bli lagt fram i møtet, då formulering av vilkåra er avhengige av innkomen uttale frå Vestland fylkeskommune

Dokument som er vedlagt:

Kartvedlegg - KDP Tokagjelet + Eikedalen hyttegrennd

Søknad om dispensasjon fra kommunedelplan for FV 49

Kva saka gjeld:

Det vert søkt om dispensasjon etter pbl § 19-2 frå kommunedelplan for Fv 49 Tunnel forbi Tokagjelet. Søknaden gjeld unntak frå delar av bandleggingssone synt i plankartet, for å gjennomføra utbygging av infrastruktur i reguleringsplan for Eikedalen hyttegrennd, som har overlappande planområde med kommunedelplan for Fv 49. Bandleggingssona har tilhøyrande føresegner nr. 2.1 *Krav om reguleringsplan* og nr. 3.2 *Sone for bandlegging for framtidig regulering*:

2-1 Krav om reguleringsplan ((Pbl § 11-9, nr. 1)

2-1.1

Innanfor plangrensa skal det utarbeidast ny reguleringsplan for alle tiltak etter pbl § 1-6, med unntak for tiltak etter pbl § 20-1c, e, h og i.

Reguleringsplankravet gjeld også for alle tiltak innanfor sikringssona til vegtunnelane. Sikringssona har ei utstrekning på 40 meter til kvar side målt frå veglina i tunnelvegplanet og 30 meter over og under tunnelvegplanet.

Reguleringsplankravet opphøyrer når ny reguleringsplan for fv. 49 er vedteken.

3-2. Sone for bandlegging for framtidig regulering etter Plan og bygningslova (Pbl § 11-8 d)

3-2.1

Bandlegginga gjeld sone langs trasé for ny fv. 49 med tilhøyrande kryss/sideanlegg på strekninga frå grensa med Kvam herad og ned mot Fossen bratte.



Figur 1. Oversiktskart som syner både reguleringsplanen og kommunedelplanen, der overlappet mellom dei er synt med eit grovt raudt omriss.

Saka er i tråd med plan- og bygningslova § 19-1 sendt til råka regional styresmakt Vestland fylkeskommune for uttale. På grunn av knappe tidsfristar for å få handsama saka før sommaren er ikkje uttalen kome inn enda, men me har ut i frå dialog med fylkeskommunen sin sakshandsamar håp om at uttalen vil koma inn før naturutvalet vert halde. Dersom uttalen ikkje rekk fram bør saka

utsett til neste møte.

Saka er ikkje nabovarsla, då alle naboar har vore varsla i samband med utarbeidinga av reguleringsplanen, og vil bli varsla i samband med byggjesøknad. Dispensasjonen fører ikkje til nokon faktiske endringar i arealføremåla i reguleringsplanen. I følge § 19-1 kan nabovarsel unnlatast når søknaden åpenbart ikkje rårar naboen sine interesser.

Bakgrunn for saka:

Kommunestyret i Samnanger gjorde 28.10.20 endeleg vedtak av kommunedelplan for Fv. 49 Tunnel forbi Tokagjelet. Heile planområdet har ei bandleggingssone for regulering etter PBL.

Den 03.12.20 gjorde kommunestyret endeleg vedtak av reguleringsplan for Eikedalen hyttegrennd. Ein del av planområdet er samanfallande med kommunedelplan for fv 49 Tokagjelet, og er såleis bandlagt i påvente av reguleringsplan for fv 49. Sjå figur 1. Sidan overlappet gjeld halvparten av den nye innkøyrsla til hyttegrenda, delar av strekninga f_SKV2, i tillegg til heile parkeringsplassen f_SPA1 er utviklinga av store delar av Eikedalen hyttegrennd «låst» i påvente av reguleringsplanen for fv 49.

Verken Geoplan AS som utarbeidde reguleringsplanen eller kommunen har fanga opp denne problemstillinga, jf. s. 10 i planskildringa, sjå figur 2.

Kommuneplan/ kommunedelplan

Reguleringsplanen vart levert til 1.gongs handsaming då Kommuneplan for Samnanger kommune 2004 – 2014 var gjeldande. Mens kommunen handsama reguleringsplanen vart ny kommuneplan vedteken av kommunestyre 13.12.2017. Arealdelen gjeld frå 2017 – 2027. Reguleringsplanen er i etterkant, tilpassa gjeldande kommuneplan.

Kommunedelplan Fv7 (no Fv. 49) Tokagjelet alternativ A5/B1/B2 – E3 låg ute til offentlig ettersyn frå 07.09.2019 til 23.11.2019. Det er ikkje avklara om det vert tunnelinnslag i Eikedalen. I møte i Kvam heradsstyre, 16.06.2020, opplyste Vestland fylkeskommune at denne lokaliteten er eit av to lokalitetar prioritert i kommunedelplanen. Planfagleg er Eikedalen å føretrekka. Det andre alternativet kjem noko betre ut i høve kalkulert utbyggingskostnad. Valet for innslagspunkt i vest vil verta avgjort politisk.




Fig. 5.3.1: Planomriss for reguleringsplan for Eikedalen (svart) og for reguleringsplan for Fv 7 Eikedalen – NAF (raudt). *Til informasjon har fv. 7 bytta nr til fv. 49 etter fylkessamanslåinga til Vestland fylke.

Reguleringsplan

Det er noko overlapp med ny reguleringsplan for Fv 7 Eikedalen – NAF. Planen arbeidet har stogga i påvente av Kommunedelplan for Tokagjelet som har alternativ tunnelinnslag i Eikedalen.

Side 10 av 60

Planomtale revidert jf. vedtak 002/2018 i Naturutvalet, Revidert 30.03.2020
Mal versjon 1.00, datert 12.07.06

Figur 2. Utklipp frå planskildringa til Eikedalen hyttegrennd. Bandleggingssona er markert med raudt rutenett over heile planområdet til kommunedelplan for Fv 49 Tunnel bak Tokagjelet. (Figurteksten i utklippet over er feil, då den høyrer til neste figur i planskildringa.)

Grunngjeving for søknaden:

Utarbeidinga av reguleringsplan for Eikedalen hyttegrennd pågjekk i perioden 2011 til 2020. Planen var ute til høyring i fleire omgongar, men den aktuelle problemstillinga vart ikkje fanga opp. Mot slutten av planprosessen inngjekk tiltakshavar Ålvik ferieheim avtale om å kjøpa ut ein fritidseigedom som har ei nøkkelplassering for å få til innkøyringa/første strekke av tilkomstvegen. Det vert ein stor økonomisk belastning for Ålvik ferieheim dersom utviklinga av hyttegrennda vert sett på vent i mange år. Det er ikkje kjent når reguleringsplan for fv 49 vil starta opp, eller når den vil vera ferdig. Finansiering av heile tunnellprosjektet er ikkje avklart, og uvisse tidsaspektet er for tiltakshavar svært uheldig.

Det vert søkt om dispensasjon frå bandleggingssona for å kunna følgja regulert situasjon for tilkomstvegen f_SKV2 (med sideareal annan veggrunn), parkeringsplass f_SPA1, renovasjonsareal f_BKT1, sjå figur 3. Ny innkøyring til området er plassert om lag 20 meter lenger nord (vekk frå fv 49) enn den eksisterande innkøyringa. Denne går i dag til ein større parkeringsplass for hyttene i lia ovanfor, og vidare opp til ei hytte. Den eksisterande innkøyringa vil bli stengt og parkeringsplassen vil

bli utvida sørvestover langs eksisterende fv 49. Renovasjonsarealet vil også i all hovudsak bli etablert på eksisterende parkeringsplass. Det er ikkje snakk om nedgravne løysingar for denne renovasjonsplassen.

Det er ikkje mogleg å flytta avkøyringa til f_SKV2 enda lenger mot nord, vekk frå bandleggingssona, fordi stigningstilhøva og kurvaturen på vegen vidare oppover i lia då blir svært vanskeleg å få til, samt at der er dyrka mark i drift nord for avkøyringa. Det har vore ein lang prosess for å plassera avkøyringa der den ligg i reguleringsplanen.

Lenger inne i utbyggingsområdet kjem ein sving av vegen f_SPA1 inn att i bandleggingsområdet. Det er avgjerande å få dispensasjon for også dette strekket, for å løysa ut utbyggingsområde som ligg lenger oppe i lia utan bandleggingssone. Mellom dagens fv 49 og denne svingen av f_SPA1 ligg det fem eksisterande fritidsbustader, og avstanden er om lag 69 meter til senterline for ny trasé av fv 49.



Figur 3. Kart som syner overlappet mellom reguleringsplan for Eikedalen hyttegrennd med overlapp av KDP fv 49 tunnel bak Tokagjelet. Dei to områda der det vert søkt om dispensasjon frå bandleggingssona er markerte med raudt omriss.

Vurderingar og konsekvensar:

Kommunen si vurdering etter pbl § 19-2:

Etter plan- og bygningslova § 19-2 kan kommunen berre gje dispensasjon dersom det ikkje fører til at omsyna bak føresegna det vert dispensert frå vert vesentleg sett til sides, eller at ikkje omsyna bak loven sin føremålsparagraf vert vesentleg sett til sides. I tillegg må fordelane ved å gje dispensasjon vera klart større enn ulepane etter ei samla vurdering.

Dispensasjonen gjeld delar av ei bandleggingssone med krav om planlegging av ny trasè for fv 49. Trasèen til fv 49 skal endrast fordi vegen skal førast inn i ein ny tunnell under Kvamskogen. Bandleggingssona er teikna i kommunedelplanens fulle breidde, og skal sikra at det er nok slingringsmonn til å plassera ny trasè og ei samankopling mellom ny og gamal trasè av fv 49.

Reguleringsplan for Eikedalen hyttegrennd har trekt avkøyringa til hyttefeltet 20 meter lenger vekk frå dagens fv 49, slik at avstand til senterlina for gamal fv 49 er 35 meter. Vår vurdering er at dette høgst truleg er tilstrekkeleg avstand for å ikkje skapa problem for reguleringa av samankopling mellom ny og gamal trasè for fv 49.

Parkeringsplassen ligg nært opptil dagens fv 49, men avstanden vil med ny situasjon for fv 49 truleg bli auka for heile lengda av parkeringsplassen. Tiltaka med tilrettelegging og utviding er reversible dersom det viser seg at ny trasè for fv 49 treng noko av arealet. Tilrettelegging for parkeringsplass bør kunna gjerast i si fulle lengde, fordi det ikkje er noko byggverk som må rivast eller fjernast dersom det viser seg at den nye fylkesvegtrasèen kjem inn på dette arealet. Parkeringsplassen bør etablerast som ei grusa flate, eventuelt asfaltering bør koma etter at reguleringsplanen for fv 49 er endeleg vedteken.

Ut i frå det ovanståande vurderer me at ein dispensasjon ikkje vesentleg set til sides nokon av dei omsyna som bandleggingssona eller plan- og bygningslova skal ta i vare.

Fordelane med dispensasjonen er at den løyser opp i ein svært uheldig og låst situasjon som tiltakshavar i god tru har hamna i. Det vil ikkje bli etablert nye fritidsbustader innanfor bandleggingssona før ny reguleringsplan for fv 49 ligg føre. Dispensasjonen vil opna for at utbyggingsområda utanfor bandleggingssona kan etablerast, og det er berre halve breidda av tilkomstvegen ved krysset som ligg innanfor bandleggingssona. I det området der heile vegbreidda ligg innanfor bandleggingssona er det ein avstand på 69 meter til senterline for ny fv 49, samt at det er fem eksisterande hytter mellom desse vegane.

Ulempene med å gje dispensasjon er at det blir litt mindre fleksibilitet i plasseringa av ny fylkesveg med kopling til gamal trasè. Det kan også bli utgifter knytt til eventuell flytting av nybygd infrastruktur i hyttegrenda, dersom det ikkje er mogleg for ny fv 49 å unngå desse areala. Flytting av vegen f_SKV2 er svært lite sannsynleg, då anten halve vegbreidda ligg utanfor bandleggingssona eller det ligg seks fritidsbustader mellom vegen og fv 49. Det skal også plasserast vatn- og avløp i vegane, men desse leidningane er det truleg mogleg å etablere langs norddelen av veglekamen, og såleis utanfor bandleggingssona. Det mest sannsynlege scenariet er at delar av parkeringsplassen må flyttast, men me vurderer risikoen for dette som liten.

Etter ei samla vurdering meiner me at fordelane er klårt større enn ulempene, og det kan vurderast å gje dispensasjon på vilkår. Fylkeskommunen sin uttale vil skissera kva vilkår dei rår til å stilla, som vegeigar av fv 49 og som planleggar av det nye vaganlegget med tunnel. Fylkeskommunen har klagerett på eit eventuelt positivt vedtak om dispensasjon.



SAKSFRAMLEGG

Sakshandsamar: Kristoffer Kleiveland	Arkivkode: FE-242
Arkivsaksnr: 21/78	Løpenr: 21/4027
Sakstype: Politisk sak	

SAKSGANG

Styre, utval, komité m.m.	Møtedato	Saksnr
Naturutvalet	25.05.2021	015/2021

Vilt- og fiskefondet 2021

Rådmannen sitt framlegg til vedtak:

Jf. vedtak 014/2019 i naturutvalet 28.05.19 får Samnanger jeger- og fiskerlag kr 20 000 i årleg driftstilskot. Tilskot for 2021 vert utbetalt snarleg.

Jf. vedtak 081/2019 i kommunestyret 05.12.19 får Kvamskogen næringsalg/Kvamskogen vel kr 15 000 i årleg driftstilskot til løypepreparering. Tilskot for 2021 vert utbetalt snarleg.

Jf. vedtektene for fondet, sak 002/2019 i formannskapet, vert det i oktober betalt ut for leige av grunn til laksetrapp (indeksregulert) – i 2021 er denne leiga på kr 7 495.

Tohaugen Ve og Vel får kr 35 000 i tilskott til oppføring av gapahauk på Tohaugen som skal vera tilgjengeleg for ålmenta.

Tysse Jeger og fiskerlag får kr 5 000 i tilskott til aktivitetar i 2021.

Tysse Jeger og fiskerlag får kr 5 000 i tilskott til kultiveringsarbeid og vedlikehald.

Tysse Trivselsgrend får kr 12 000 i tilskott til realisering av fuglekikkert og undervannskamera i Tysseelva og Tyssekaiaen.

Dokument som er vedlagt:

Søknad kulturmidler 2021

Kulturmidler 2021

Søknad om tildeling av konsesjonsmidlar

Resultatrapport

Budsjett 2020

Søknad om midlar frå Vilt- og fiskefondet

Søknad om støtte til nærmiljøanlegg på Tohaugen

Søknad Tohaugen

Dokument som ikkje er vedlagt:

KS- vedtak 104/2020: Budsjett 2021 Samnanger kommune

Kva saka gjeld:

Samnanger kommune skal kvart år lyse ut høve til å søka om konsesjonsmidlar. Søknadsfristen er 1. april. Fondet skal nyttast til tiltak som ivaretek og eller betrar tilhøva for fisk, vilt og friluftsliv i kommunen. Private, frivillige lag og offentlege instansar kan søkje fondet om tilskot. På fondet står det pr. 01.01.21 kr 205 000. Grunnkapitalen på fondet skal alltid vera større enn kr 80 000, og det vert teke sikte på å fordela inntil kr 100 000 i året. Dersom særleg gode søknader ligg inne, kan det brukast større summar enn dette, så lenge det ikkje går ut over grunnkapitalen i fondet.

Kommunen delar årleg ut tre faste tilskott frå fondet. Dette er kr 20 000 i driftstilskott til Samnanger Jeger – og fiskerlag, kr 7 495 i leige av grunn til laksetrapp i Tysseelva (indeksregulert) og kr 15 000 til løypepreparering på Kvamskogen. Desse utgiftene skal dekkast først uavhengig av handsaming i saka.

Det er komme inn 3 søknader til Vilt- og fiskefondet i 2021, i tillegg er det ein søknad frå Samnanger Jeger – og fiskerlag som er overført frå ordinære kulturmidlar til Vilt – og fiskefondet då denne naturleg fell innunder fondet sitt føremål. Til saman vert dette 4 søknadar.

Vurderingar og konsekvensar:

Kulturmidlar og Vilt- og fiskefondet er søknadsordningar kor tildeling eller storleiken på tildeling ikkje er gjeven på førehand. Tildeling eitt år gjev ikkje presedens for seinare tildeling.

Søknad 1

Samnanger jeger og fiskerlag (SJFL) søker om driftsmidler (kulturmidler) på kr 15 000. Under gjennomgang av søknadane til kulturmidlar, vart det bestemt å overføre søknaden til Vilt- og fiskefondet. SJFL har fått skriftleg varsel om dette, det har ikkje komme protestar på dette.

Vurdering søknad 1

Samnanger Jeger og fiskerlag (SJFL) søkte om kr 15 000 til driftstilskott for laget. Det vart løfta fram i søknaden den breie aktiviteten laget har å tilby, samt utfordringar laget har med vedlikehaldskostnader på ulike bygningar og særleg vegen laget driftar saman med Tysse Skyttarlag. Laget har kring 200 medlemmer, og er svært aktivt med mange ulike aktivitetar og prosjekt som er planlagt.

Tiltaka som er vurdert stettar formålet med Vilt- og fiskefondet.

Søknad 2

Tohaugen Ve og Vel søker om tilskott på kr 35 000 til oppføring av gapahauk/daghytte på Tohaugen.

Vurdering søknad 2

Tohaugen er eit sentralt turmål attmed skogsvegen mellom Vassvegen og skiløypa i Totræna. Tohaugen Ve og Vel ønskjer å føre opp ein gapahauk/daghytte som kan nyttast heile året for alle som ynskjer. I tillegg til gapahauk ønskjer laget og sette opp benkar og bålpanner besøkande fritt kan nytte. Dette er eit godt prosjekt som vil vera til glede for mange.

Tiltaka som er vurdert stettar formålet med Vilt- og fiskefondet.

Søknad 3

Tysse Trivselsgrend søker om tilskott til innkjøp og montering av fuglekikkert, samt undervannskamera i og ved Tysseelva og Tyssekaia med uteskjerm som viser livet i elva og sjøen.

Vurdering søknad 3

Tysse Trivselsgrend ynskjer å skapa meir aktivitet og liv på Tysse. Dei har i søknaden lagt vekt på aktivitetar som vonleg vil engasjera og aktivisera store og små med naturen i og rundt Tysse som utgangspunkt. Dette er også eit spanande tiltak for dei med nedsett funksjonsevne, grunnskulen og barnehagar då dette er eit tiltak som femnar breitt.

Tiltaka som er vurdert stettar formålet med Vilt- og fiskefondet.

Søknad 4

Samnanger Jeger- og fiskerlag (SJFL) søker om driftsmidler til kultivering og vedlikehald.

Vurdering søknad 4

Laget arbeider med kultivering av fisk i elvar og vassdrag i kommunen. Samtidig legg dei ned mykje arbeid i vedlikehald av mellom anna skyteanlegget, klekkeri samt ulike naust, jakt og fiskebuer.

Tiltaka som er vurdert stettar formålet med Vilt- og fiskefondet.

Sluttvurdering og konklusjon

Alle tiltaka som er søkt om stettar formålet med tilskotsordninga, og ein ser at fondet har stor verdi for dei laga som naturleg fell inn under denne ordninga.

Ein kan gjeva støtte til 75 % av kostanden av tiltaket avhengig av andre finansieringskjelder og mengda tilgjengele midlar. Heile eller delar av fondet kan haldast attende dersom det ikkje ligg føre godt kvalifiserte søknadar.